

Mepepelime ma Bulu a tyo ya Aza a Galatiya

Ucuduwu wa aatagada a nda

Bulu dana ta mepepelime ma nda a tyo aza e Itoni atsuma a Galatiya. Galatiya ida i da, waru ilyuci i gbagbain i ta pe atsuma a yi. Bulu dana ta mepepelime ma nda a tyo a a'isa aza e Itoni suru. Bulu kandaruwa ta ida'a suru, adama o ndolo u ta na n'utsa atsuma a aza e Itoni a na a ri pe. Agba ozo o ro de a damma ta a na Bulu aajiya a amayun a da shi.

Bulu danaa ta ama tsara u roco cine wo o'woi aajiya a amayun. Ana u kotoi a yuwusan adanshi e ili i nda, u rito le ta a na a ta tsura iwawi o ure u sa'ani adama a na a ta nu ucawu wo okolo atsuma a Kristi Zamawawa. Ure wi itoni i wila u tsu tawa ni iwawi shi. U roco le ta a ta gura toni ure wa Asula za na wu ntsayi faan, waru a cigalai.

Ili i na Bulu dammai aza e Itoni a Galatiya suru amayun a da fo a tyo aza e Itoni a ana'an. Suru tsu ta faan na tsoo toni Asula o ure u na wu ntsayi, o ure wu ucawu wo okolo. Wila u tsu kamba tsu ta tsu reve cine tsa yuwan wuma, amma ucawu wo okolo a da goon woo bolo tsu na Zamawawa reve u tawa tsu ni iwawi.

Ili i na i ri pe atsuma a aatagada a nda

1. Ajiya a amayun ni ikaka ya amayun (1:1-10)
2. Asula dangwa ta Bulu o o'wo aajiya (1:11-24)
3. Bulu isawaan ta ikaka ya yi (2:1-21)

4. Ucawu wo okolo a da goon u tsu tawaā ni iwawi (3:1–4:31)
5. Za na ri na Ruhu tsu roco ta icigi (5:1–6:10)
6. Morono ma atsuvu mo ukosu (6:11-18)

Icasu

¹⁻² Amu, Bulu, n ta danasa mepepeline ma nda a tyo a a'isa a aza e Itoni atsuma e ida ya Galatiya. Amu aajiya a da. Vadilima da dangwa numu shi. Waru obolo a ama a da a dangwa numu shi. Amma Yesu Kristi Zamawawa da dangwa numu na aciyayi. U yuwan ta ne obolo na Asula Dada, za na 'yasain Yesu diga o ukwa. Ama a tsu a na a ri pa fo suru obolo na amu tsu ta lyungusaa du ni icasu i tsu.

³ Lyawa Asula Dada tsu na Zagbain tsu Yesu Kristi Zamawawa roco du isa'ani, reve waru a ca du asuvu nden.

⁴ Yesu Zamawawa Zagbain kuwa ta adama o unusu u tsu, cine Asula Dada tsu foboi, tsara u wawa tsu diga o uvadi wi iwuya i nda ubata u na tsu ri a nden gogo.

⁵ Ayi da i zuwai tsugbain suru tso o'woi za va Asula a tyo a mantsa suru babu ukotu. Ami.

Alabari a Sa'ani a nda goon

⁶ N yuwan ta asalama lon a na i farashi uvadalasa a lyawusa Asula. U dangwa du ta adama e isa'ani ya Yesu Kristi Zamawawa. Amma gogo adu da nda o tonishi ikaka i ro ko'o.

⁷ Amayun a da, ikaka i ro yi lo shi, she ikaka ya Alabari a Sa'ani goon, ko na wo o'woi ama o ro o ta lo na a gbandarasa du. A ciga ta a vadala a Alabari a Sa'ani e Yesu Zamawawa a tyo ili i ro ko'o.

⁸ Lyawa Asulā a yuwaan za na yuwaan ndu alajiya e ili i ro ko'o ni ikaka i tsu a tyo ya'a du suru unā! Asulā a yuwan ne, ko nā shi wo o'wo a tsu a aciyatsu tsu tawāā ni ikaka i ro ko'o, waru ko nā shi wo o'wo malingata mā Asulā ma da mā tawāyi ni ikaka i ro ko'o.

⁹ N damma tā ne, waru n tā dashi dammisa: Nna za ro yuwan alajiya o ro ko'o nā za na i fara ushiyi, lyawa unā wā Asulā u reme vuma ndolo.

¹⁰ Maa yuwusan ili adama n yo'onoto ama okolo shi. Amma n ciga tā n yo'onoto Asulā okolo. I ta majiyan n ciga tā n zuwa ama a ciga mu? Nā ne da maa yuwusan, n shi o o'wo aagbashi a Kristi Zamawawa shi.

Asulā e de tā Bulu

¹¹ Ama a vā, n ciga du tā i reve Alabari a Sa'ani a na n yuwaan du alajiya, ili i na ama a yuwain da shi.

¹² Ubata wa ama a da n tsurā niyi shi. Ko za rito mu ayi shi. Yesu Kristi Zamawawa da roco numu uritosu u nda suru.

¹³ I reve tā cine n danai ana n danai o tonon ure wa aza a Isra'ila. N ca tā aza e Itoni atsumalima waru n yuwan tā ukadu u na mee bete'we le.

¹⁴ Aza a Isra'ila o ro u'yowun u da tsu tā, amma n la'a tā ozo o ro e le nā abunda toni wilā wu nkaya n vā. N danā tā e meje'en n yuwan ne.

¹⁵ Agba kafu a matsan mu, Asulā a dangwa mu tā. U yuwan tā ne adama e isa'ani ya yi.

¹⁶ Reve mantsa mā tawā ana u roco numu Mawun mā yi adama n yuwan adanshi a yi ubata wa Atakpaci. A mantsa mo ndolo, m pati za ca mu asala shi.

¹⁷ N 'yawa Urishelima adama n cina de ama a na o o'woi de ajiya kafu mo o'wo aajiya shi. Ili i na n yuwain a mantsa mo ndolo ayi da, n kara ta a tyo Laraba n danu de mantsa wa'a. Reve n kara a kamba Dimaska.

¹⁸ Ana a'wan a ta'atsu a karai, reve n kara a tyo Urishelima n 'yawa m bura Bituru, avu n danu de hali rana kupa no ozo o ton.

¹⁹ Waru me ene ta fo Yakubu zawa'a vu Zagbain, agba me ene akapi a ajiya'a a mantsa mo ndolo shi.

²⁰ N kucina ta na Asula, epen a da maa yuwusan shi.

²¹ Mantsa mo ro de, n toni ta ni ida ya Suriya ni ida ya Kiliya.

²² A mantsa'a aza e Itoni atsuma a Yahuda koto a shi e ene mu shi.

²³ Ele a uwwa ta a yuwusan adanshi a va goon adansa: "Apa vuma na tawaa ntsu na addama, waru u yuwusan ta ukadu u na wee bete'we aza e Itoni. Amma gogo u ta dansaa ama o toni ikaka'a."

²⁴ Reve a cuwa Asula adama a va.

2

Ajiya a ushiyi Bulu

¹ Ana a yuwain a'wan kupa na aza a nashi, reve n kambisa Urishelima obolo Banaba, waru n tara ta Titu.

² N 'yawa ta de adama a na Asula o roco numu alavu alavu adansa mu n kara. Amu de, n yuwan ta adanshi na azagbain a a'isa a aza e Itoni goon. N shi ta n ciga n zuwa le e reve ikaka i na maa dansaa Atakpaci. N shi ta n ciga ajiya'a a lyungwa

ili i na moo ritosu. Nnā a usu uritosu u va shi, uritosu u na n yuwain hali a tyo a mantsa ma nda u to o'wo ili ye pere.

³ Ana a uwwai ili i na n dammai, a usu yi ta. A zuwa a pada i'utsa i va Titu za na shi obolo na amu uryumbu shi, ko na wo o'woi ayi Takpaci* da.

⁴ Aza e itoni e epen o ro o odoru ta a uwa atsuma a tsu. A uwa ta atsuma a tsu gashi aza a matawa mo utyo adama e reve ufa lu u na Yesu Kristi Zamawawa ca ntsu. A ciga ta a kambato tsu agbashi. Ama o ndolo a da a zuwa ntsu tsu yuwain adanshi a mapada mo uryumbu.†

⁵ Amma tsu tonoo ada aza e itoni e epen o ndolo shi, ko ke'en. Tsu ciga ta amayun a Alabari a Sa'ani a dana obolo na adu.

⁶ (Ozo o ro atsuma a aa'isa a aza e Itoni a nda a tara ta aciyele gashi azagbain a da, amma ayi ndolo ili i ro i da shi ya'a va. Asula a ta tarasa ama ili i ta.) Ne da aa vadala Alabari a Sa'ani a na n yuwain shi.

⁷ E ene ta Asula a ca mu ta ulinga wa alajiya a Alabari a Sa'ani a tyo ubata wa Atakpaci, cine u cayi Bituru ulinga wa alajiya a tyo ubata wa aza a Isra'ila.

⁸ Asula a ca ta Bituru ucira u na waa yuwan ulinga wa aajiya atsuma a ama a Isra'ila. Ne da fo u ca numu ucira u na maa yuwan ulinga wa aajiya a tyo ubata wa Atakpaci.

* **2:3** Titu Takpaci da, waru ele ama o ndolo a tsu pada vali uryumbu shi. Aza a Isra'ila gba vali suru a ta pada yi uryumbu. Ili ya asalama i da ana wo o'woi ajiya a zuwai a pada Titu uryumbu shi.

⁹ Ana Yakubu na Bituru na Yahaya† (aza a na ama suru e revei azagbain a da) e revei Asula a ca mu ta une'e u gbain u nda, reve a ushi mu na Banaba alingi atsuma a aza a na aa yuwusan ulinga obolo. A dashi tsu ta asuvu ugbamu tsara tsu lyuwa elime a yuwusaan Atakpaci alajiya, waru a mantsa ma ta a ta lyuwa elime nu ulinga u le atsuma a aza a Isra'ila.†

¹⁰ Ili i ta i na a pati ntsu tsu yuwan, ayi da tsu cuwan na alambi, waru n dana ta no okolo a na maa yuwan ne!

Bulu bara ta Bituru

¹¹ Urana u ro, ana Bituru tawai atsuma a Antakiya, u yuwusan ta ili i babu ulobonu lon, reve amu adama o ndolo m bara yi a makakan ma aza e Itoni.

¹² Apa ili i na i farai: Ana u fara rawai, u lyuwusa ta obolo na Atakpaci aza e Itoni. Avu Yakubu lyungu aza e Itoni o ro aza a Isra'ila a tyo Antakiya. Ana ama a nda a rawai, Bituru dashi lyuwisa na Atakpaci waru shi, adama a na u dana ta a uwwusa wovon wi ili i na ama a nda aa damma adama a yi.

¹³ Reve akapi a aza e Itoni a Isra'ila fo o toni yi na mayan me ikpa'a ne, hali fo na Banaba toni le ta na mayan me ili i babu i mejege i nda.

¹⁴ Ana me enei oo tonono mejege ma amayun a Alabari a Sa'ani shi, reve n yuwan adanshi na Bituru a makakan me le suru. Avu n damma, "Bituru, avu za va Isra'ila da, amma vu ta yuwusan ili gashi Takpaci, agba vadamma avu za va Isra'ila da shi.

† 2:9 Atsuma o uguzu u nda Bulu yuwan ta ulinga na Tsu'arama u de aala a Bituru: "Kefa."

Nā ne ɗa, nye i zuwai vu cigai vu zuwa Atakpaci a nda o toni ili i na aza a Isra'ila a yuwusan?

¹⁵ “Amu nā aṅu umatsun wa aza a Isra'ila a ɗa, waru aṅsu omocin a ɗa shi e ekere a Asulā cine Atakpaci a ri.

¹⁶ Amma suru nā ne, tsu reve ta a na tso o'woi aza a aḅulā† nā Asulā nu ucawu wo okolo aṅsuma a Zamawawa, agba adama a na tsu yuwain ili i na Wilā'a u damma ntsu tsu yuwan ɗa shi, adama a na za lo na a kambā za va aḅulā nā Asulā nu utonishi u Wilā shi. Adama o ndolo tsu ca ta Yesu Zamawawa okolo, tsarā Asulā a ushi tsu adama o ucawu wo okolo a tsu e ekere a Zamawawa.

¹⁷ “Aza a Isra'ila o ro a tara tsu ta aza o unusu adama a na tsu ca ta okolo Kristi Zamawawa ta kambuwa tsu aza a aḅulā nā Asulā adama o ndolo a ɗa tsu toniyi Wilā wa aza a Isra'ila suru shi. Ayi ndolo u ta dansa Zamawawa zuwa tsu ta tsu yuwan unusu? O'o, ne ɗa shi!

¹⁸ Amma nā n kambā n toniso Wilā'a waru, to, n ta yuwaan Asulā unusu wa amayun.

¹⁹ Ana n toniyi Wilā'a, u polo mu ta, reve u putsaa mu a yuwan wuma u na Asulā a cigai. Gogo nda gba Wilā'a u buwa nu ucira a aci a va shi, adama n yuwan wuma u na Asulā a cigai.

²⁰ A vara mu ta a akpata† obolo nā Kristi Zamawawa. Amu na aciyava a ɗa maa yuwusan wuma shi, amma Kristi Zamawawa na ri nden pe aṅsuma a va. Pe aṅsuma a lipu va aṅsuma o uvadi u nda n ca ta okolo ubata u Mawun mā Asulā. U ciga mu ta waru ayi na aciyayi a ɗa u dangwai u kuwa tsarā amu n dana wuma.

²¹ Amu mu pe aṅsuma a ama a na a 'yuwain

isa'ani ya Asulā shi. Nnā Asulā a ushi tsu nu ure u Wilā, to, Kristi Zamawawa kuwā ta pere.”

3

I ca okolo

¹ Adū, olo aza a Galatiya! Zane da pusan ndu ana? N roco du ta mejege ili i na i zuwai Yesu Kristi Zamawawa kuwai a akpata.†

² N ta yuwan du yeci i ta: I ushi ta Ruhu va Akiza adama a na i toniyi Wilā? O'o, ne da shi! Ruhu va Akiza tawa du ta adama a na i usuyi ikaka i na yu uwwai e Yesu Zamawawa.

³ Adū i ri na aci shi? I fara ta a yuwusan wuma atsuma a Kristi Zamawawa atsuma a Ruhu va Akiza, amma gogo i ciga ta i lyuwa elime nu ucira u du.

⁴ I sowo ta atsumalima lon adama a Alabari a Sa'ani. N ciga atsumalima a nda a kara pere shi.

⁵ Ana Asulā a ca ndu Ruhu va Akiza va yi waru ana u yuwain linga va asalama atsuma a du, u yuwan ta ne adama a na i toniyi Wilā wa Musa? Ne da shi! U yuwan ta ili i nda adama a na i ushiyi ikaka ya Yesu Kristi Zamawawa na yu uwwai.

⁶ Apa ili i na Adanshi a Asulā a dammai: “Ibrahim ca ta Asulā okolo a yi, awu Asulā a tara yi abula e ekere a yi.”

⁷ Ayi nda u roco ta muwun ma Ibrahim ele da aza a na suru a cayi okolo ubata wa Asulā.

⁸ De nu ujimu Adanshi a Asulā a damma ta a na Asulā a ta ushi Atakpaci adama o ucawu wo okolo e le. Asulā a yuwaan ta Ibrahim nzuwulai ma

Alabari a Sa'ani a nda ɗe nu ujimu ana u dammai, “Uvadi maɓula u ta tsura aba'un adama a wu.” ◇

⁹ Ayi nda u to rocosu za na suru ri nu ucawu wo okolo, u ta na akunda atsuma a aba'un a na a cayi Ibrahim adama o ucawu wo okolo a yi.

¹⁰ Za na suru ri a majiyan utonishi u Wila u da waa zuwa yi wo o'wo mejege na Asula, u ta ushi una wa Asula. Adama a na Adanshi a Asula a damma ta, “Za na suru aa yuwusan tsutoni na Wila suru u na u ri pe atsuma a Aatagada a Wila shi, u ta ushi una wa Asula.” ◇

¹¹ U ta babu usan vu reve za lo, na itoni i Wila yaa zuwa yi za va aɓula e ekere a Asula shi, adama a na Adanshi a Asula a damma ta, “Asula a ta ca za na ri nu ucawu wo okolo wuma.”

¹² Ili i ɓolo utonishi u Wila nu ucawu wo okolo shi, adama a na Adanshi a Asula a damma ta, “Vuma na cayi okolo a Wila u ta yuwan wuma cine Wila'a u dammai.” ◇

¹³ Amma Yesu Kristi Zamawawa wawa tsu ta diga o una u na Wila u yuwain. Ana a vara niyi a akpata u ushi ta una u na u shi a tawa ya'a tsu. Adama a na Adanshi a Asula a damma ta, “Asula a yuwaan ta za na a varai a akpata biti una.” ◇

¹⁴ Adama a na Yesu Kristi Zamawawa yuwain ne, daɗa Asula a zuwayi Atakpaci aba'un cine u yuwayin Ibrahim nzuwulai, ne da fo atsu aza e Itoni tsu ushiyi Ruhu va Akiza a na Asula a yuwain nzuwulai adama o ucawu wo okolo.

Adama a Wila

◇ 3:8 Ufr. 12:3; Ufr. 22:18. ◇ 3:10 U.Wl. 27:26. ◇ 3:12 N.Gn. 18:5.

◇ 3:13 U.Wl. 21:23.

¹⁵ Ama a va, apa iroci cine tsa a yuwusan wuma: Nna ama e re a yuwan akucunu o ure u sa'ani, she za ro kuɗa ko u vadala adanshi o ndolo wan. Ne ɗa u ri na nzuwulai ma Asula n nda.

¹⁶ Asula a yuwaan ta Ibrahim nzuwulai n nda na mawun ma tsukaya ma yi. ◇ U yuwaan muwun n tsukaya n ro ma abunda nzuwulai'i shi, amma a tyo a za ta, ayi gba za ta ndolo ayi ɗa Kristi Zamawawa.

¹⁷ Apa ili i na maa dansa: Asula e isawaton ta adanshi na Ibrahim waru u yuwan ta akucunuɗ a na waa guza yi. A'wan ukpakunashi na mata'atsu (430) na acapa, ɗaɗa u cayi Wila'a. Wila u ndolo waa gura vadala nzuwulai'i shi. Nu u shi u yuwan ne, u shi ta lungusa nzuwulai n na Asula a yuwayin Ibrahim.

¹⁸ Nna Wila'a waa gura ca tsu aba'un a na Asula a yuwayin Ibrahim, to, aba'u'un u buwa adama a nzuwulai'i shi. Amma wo o'wo ne shi, adama a na Asula a ca ta Ibrahim aba'un a yi pere e ekere a nzuwulai n na yuwain.

¹⁹ Adama a nye Asula a zuwai Wila'a? U zuwa yi ta adama a na ama a yuwusan ta unusu. U zuwa ta lo Wila'a, hali she na vuma ta na u dammai waa tawa'a u rawa. U zuwa ta nlingata ma yi n ca Musa Wila'a, reve Musa ca ama a Isra'ila Wila'a. Ne ɗa Musa danai za na shi e memere me le.

²⁰ Za na ri e memere ma ama u tsu yuwan ta adanshi na ama a na u ri e memere me le, amma Asula na aciyayi a ɗa a yuwain nzuwulai'i ayi a nde'en.

²¹ Asula a ta a tsurala na nzuwulai ma yi ana u

◇ 3:16 Ufr. 12:7; Ufr. 13:15; Ufr. 24:7.

cayi Wilā? Ne da shi. Nna a shi a tsura wuma u babu ukotu atsuma a Wilā, to, a na a kambato ta aciyele aza a abula e ekere a Asula nu utonishi u Wilā.

²² Amma Adanshi a Asula a damma tsu ta unusu wu nla ta vuma suru, waru waa gura toni Wilā shi. Adama o ndolo ure u ta goon u na Asula aa ca za ili i na u yuwain nzuwulai ayi da na vuma ndolo ca okolo ubata wa Yesu Kristi Zamawawa.

²³ Wilā'a u golo'uso tsu ta tsa aza a na a ri o u'wa wa ali. U zuwa tsu ta zala vu ucira va yi, hali she na mantsa ma na tsaa ca okolo ma tawa.

²⁴ Wilā'a u dana ta zagbain tsu, hali she na Kristi Zamawawa tawai. Ana Kristi Zamawawa tawai u zuwa tsu ta aza a abula e ekere a Asula ana tsu cayi okolo ya'a yi.

²⁵ Gogo a na tsu ri nu ucawu wo okolo ya'a yi, Wilā'a u buwa o tsugono tsa tsu shi.

Adu muwun ma Asula n da

²⁶ Suru ndu muwun ma Asula n da adama o ucawu wo okolo a du ya Yesu Kristi Zamawawa.

²⁷ Waru ana a rumbu ndu, wo o'wo ta gashi yo oto ta Kristi Zamawawa cine i tsu oto itana i sa'avu.

²⁸ Ucawu wo okolo ya Yesu Kristi Zamawawa da u kambatoi za suru atsuma a du unata: na avu za va Isra'ila da ko Meheleni,† nna avu aagbashi a da ko avu aagbashi a da shi, ko na avu vali da ko ka, za suru unata u da u ri na za va yi.

²⁹ Adama o ndolo na adu aza a Kristi Zamawawa da, gogo adu yo o'wo ta muwun n tsukaya ma Ibrahim, waru vu ta ushi agadu a na Asula a yuwain nzuwulai.

4

¹ N ta cayisa ɗu iroci i ro: mawun me ke'en ma na dada va yi kuwai waa guza itana i na dada va yi dammai aza a yi a da shi. U ta dana gashi aagbashi a mantsa mo ndolo ko na wo o'woi ayi da za vi itana'a.

² Ama a na aa kalyuwusa yi ni itana ya yi ele da aa kalyuwa ili suru, hali she na mawu'un u kungwa ununa dada va yi dammai.

³ Ne da u shi na atsu. Tsu shi ta gashi muwun waru cira vu uvadi u nda icu'un icu'un a shi ta o tsugono a aci a tsu.

⁴ Amma ana mantsa ma yuwain, Asula a lyungu ta Mawun ma yi, reve ka matsan yi. Avu Mawun ma yi ma yuwan tsutoni na Wila'a,

⁵ adama u lyawa tsu faan e ekere a Wila'a, tsara atsu fo tso o'wo muwun ma Asula.

⁶ Ana wo o'woi adu muwun ma Asula n da, u lyungu ta Ruhu Mawun ma yi o okolo a du, reve Ruhu'u u saala, "Dada, Dada va."

⁷ Adama o ndolo gogo avu aagbashi a da shi, avu mawun ma Asula ma da, waru ne da waa ca wu ili i na u yuwaïn nzuwulai.

Bulu roco ta aza a Galatiya icigi

⁸ Ana i shi i revei Asula shi, i dana ta aagbashi e ili i na i ri ili ya amali, agba ili i nda'a Asula a da shi, ko ke'en.

⁹ Amma gogo i reve ta Asula, waru u lobono ta n damma du na Asula e reve ndu. Adama o ndolo, nye i zuwai yaa kambu a cira icu'un icu'un vu uvadi u nda na ri nu ucira shi, waru ili ye pere i da? Nye i zuwai i cigai i kambisa agbashi e le waru?

¹⁰ Hali yaa yuwusan aḅuki o ucuwusan vu rana ro, na woto ro, na mantsa mo ro, na a'wan o ro.

¹¹ Gogo n ta uwwusa wovon adama a na mantsa ma na n yuwain ulinga na aḁu wo o'wo ta pere.

¹² Ama a va, n te ipati i dana faan ni ili i nda, cine amu n yuwain wuma faan. Adama a na mo o'wo ta gashi cine aḁu Atakpaci i danai, n ta dansa n dana ta faan na Wila.

Ana n fara yuwaan ndu alajiya i le'e mu shi.

¹³ I cuwan n dana ta ubanakun ana n fara tawaa ndu na Alabari a Sa'ani e Yesu Kristi Zamawawa.

¹⁴ Ko na wo o'woi ubanakun u va wo o'wo ta malyungwa e ekere a du, agba suru na ne i 'yuwan a ca mu tsugbain shi, waru i kuda a kalyuwa mu ulobonu shi. Amma, reve i ushi mu gashi amu malingata ma Asula ma da. I ushi mu ta waru gashi amu da da Yesu Kristi Zamawawa'a na aciyayi.

¹⁵ N ta gura damma na amayun, hali gba u shi ta gashi u ta la'aa du i fodo esu a du reve i ca mu ele. A te isa'ani i du a tyo ya'a va gogo?

¹⁶ Amu ma'yuwatan ma du ma da gogo adama a na maa dansaa du amayun?

¹⁷ Munlu me epen n nda maa yuwusan ili i nda adama a tawaa du ni isa'ani shi. A ciga ta a lyuwa aci a du na aḅunda lon adama i kuru le. A to ukadu u na ee geshe du na amu adama i poloo le atsuvu ulobonu.

¹⁸ Gogo u lobono ta a na i ri e meje'en i yuwan ili i sa'ani, waru u la'a ta ulobonu na yaa yuwusan ne ana n ri obolo na aḁu shi.

¹⁹ Amma suru na ne, ncigata n muwun n va, n ta gashi n ta uwwusa mba la n limatan adama a du

cine n yuwain nu ufaru, waru m̄b̄al̄a'a n ta lyuwa elime hali she na ama e ene Kristi Zamawawa pe ātsumā ā ḡu.

²⁰ N ta maluwa a damma n tā ḡe ōb̄olo nā āḡu gogo, tsarā n yuwan adanshi nā āḡu ben. Gogo majiyan mā vā mo o'wo tā wumbu a aci a addama a nda.

Muwun n re ma Ibrahim

²¹ Hali n gogo ozo o ro ā ḡu a ciga tā ā ḡanā zalā Wilā. Damma numu, i reve tā ili i na Wilā'a waa ḡansa?

²² Adanshi ā Āsulā a damma tā Ibrahim ḡanā tā nā muwun n re. Mma mawun tā aagbashi ā ḡā ā ḡanāi, mma vu za ve ire gba shi aagbashi ā ḡā shi.

²³ Reve ka na ḡanāi aagbashi a matsan cine wu ntsayi a matsan. Amma āvu ka na ḡanāi fāan u matsan fo adama a na ne ḡā Āsulā a yuwayin Ibrahim nzuwulai ili na yaa fara.

²⁴ Ili i nda suru i tā fo o ritosu ili i ro: Āmāci e re'e ā tā ḡashi akucunu e re a na ā ri e memere mā Āsulā na ama ā yi. Akucunu ā tā āyi ḡā Wilā u na Āsulā a cayi Musa zuva Masasan ma Sinai,† waru ama a na o toniyi akucunu a nda ā tā ḡashi agbashi. Ka na ā tsu ḡe Hajaraf za na ḡanāi aagbashi āyi ḡā tsa akucunu o ndolo.

²⁵ Āyi ḡā iroci i Masasan ma Sinai ātsumā a Laraba. Amma gogo lyuci vā Urishelima wo o'wo tā ḡashi Masasan ma Sinai, adama a na lyuci'i na ama ā yi ā tā ā nden n tsugbashi ātsumā ā Wilā.

²⁶ Amma Saratu, ka na aagbashi ā ḡā shi, iroci i Urishelima va zuva ḡā. Waru āyi ḡā mma tsu.

²⁷ Adanshi ā Āsulā a yuwan tā adanshi adama ā yi,

“Vu yuwan maṙaṙa aṙu idari yi ka!
 Aṙu na koto vu revei cine mbala n limatan n ri shi,
 vu teme ishīpa aṙu vu yuwan ikelenu i maṙaṙa.
 Adama a na muwun mu ka na ri idari
 gogo a la'a ta muwun mu ka na n ri na vali
 abunda.” ◇

²⁸ Ama a va, aḍu muwun ma Asula n da adama a
 nzuwulai ma yi, cine Ishiyaku danai.

²⁹ A mantsa mo ndolo, Isma'ila,† mawun ma
 na a matsain cine wu ntsayi a matsan, ma ca ta
 Ishiyaku atsumalima, za na a matsain o ure u
 Ruhu va Asula. Ne da fo u ri ana'an.

³⁰ Amma nye Adanshi a Asula a dammai a aci e
 ili i nda? U damma ta, “Vu lo aagbashi a ka'a na
 mawun ma yi. She mawun ma aagbashi'i u tsura
 ili ya agadu a ta atsuma o utsuru wa dada va yi
 wan. Mawun ma ka ma na ma ri faan u gada le
 suru.” ◇

³¹ Ama a va, atsu muwun mu ka na n ri faan da,
 amma aza a aagbashi a da shi.

5

Tso o'wo ta faan atsuma a Zamawawa

¹ Gogo tso o'wo ta faan, adama a na Yesu Za-
 mawawa zuwa tsu ta tso o'wo faan. Adama o
 ndolo yi isawan mishin. She i vadala i kambisa
 agbashi a Wila waru wan.

² Uwwai! Amu Bulu, n ta dansaa du ili i nda:
 Nni i lyawa le a pada du uryumbu, u to rocosu
 Zamawawa ili ye pere i da e ekere a du.

³ N ta dansaa du waru nu ucira za na a padai
 uryumbu suru u 'yuwan u ciga u toni Wila'a suru.

⁴ Waru na vu yuwan ukadu u na voo yo'onoto Asula okolo na mayan mo tsutoni na Wila, vu kasa ta aciyawu na Zamawawa, waru vu 'yuwan ta a ushi isa'ani ya Asula.

⁵ Ruhu da tsu zuwa tsu tsu reve a na Asula a ta ushi tsu tsa ama a abula adama a na tsu ca ta okolo ubata wu Zamawawa.

⁶ Na avu za vi Itoni va Yesu Zamawawa da wo o'wo ili i ro shi ko na a pada wu uryumbu ko na a pada wu shi. Ili yu ulobonu ayi da ucawu wo okolo a wu ayi da waa zuwa wu vu ciga ama.

⁷ Ununa i danai o tonishi Kristi Zamawawa u dana ta ulobonu, reve nanza tawa u vadala du diga a amayun.

⁸ Amma amayun a da vuma ndolo Asula a da shi, za na dangwa ndu.

⁹ Wolilo wa'a u tsu zuwa ta yira ya abunda i tsutsa. Ili i na waa dansa ayi da, uritosu we epen wa'a u tsu vadala ta ama a abunda.

¹⁰ Amma n zuwa ta okolo ubata wa Asula, yaa usu uritosu wa ama e epen o ndolo shi, amma i toni ili i na n dammai. Asula a ta ca aza a na a jambarasa du atsumalima, ko na zane da u shi.

¹¹ Ama a va, nna m buwa a yuwusan alajiya, a na ama a 'yuwan a ciga a pada le uryumbu, nye i zuwai aza a Isra'ila a casu mu atsumalima? Na n shi a yuwusan alajiya a nda, o una u na maa yuwan alajiya o ukwa wa Kristi Zamawawa, n shi a dana a nususaan le shi.

¹² N te ipati za na a damatosun du suru a pada le uryumbu goon shi, amma o fodo arawa e le!

¹³ Ama a va, Asula e de du ta adama yo o'wo faan! Amma she i lyawa mo'wo ma faan mo ndolo wo

o'wo ɗu ure u na yaa ɗana a maluwa ma mayan mo unusu wan. Amma, i cigalai waru i kambulai.

¹⁴ Wila'a suru ili i ta i da na ayi nda: "Vu ciga moron ma nden ma wu cine vu cigai aciyawu." ◇

¹⁵ Amma ni i lyuwa elime na ngagalai na ncalai ma atsumalima, ni i yuwan ugbozu shi, i ta lungusulai suru suru.

Ruhu va Asula ni ili i na tsu cigai

¹⁶ N ta dansaa ɗu: I lyawa Ruhu lyuwa elime a ɗu, ne tsundolo tsa da yoo toni ili yi iwuya i na i cigai shi.

¹⁷ Ruhu'u ni ili i na i cigai n'yuwatan n da. A mantsa suru a tsu yuwusan ta nlangi vani le, adama o ndolo yaa yuwan ili i na i cigai shi.

¹⁸ Amma na Ruhu da aa lyuwusa elime a ɗu, Wila waɗa ɗana o tsugono a aci a ɗu shi.

¹⁹ Za suru reve ta ili i wuya i na okolo a tsu ciga: A tsu yuwan ta tsipere. A tsu yuwan ta ili i wono. A tsu yuwan ta majiyan me tsipere lon.

²⁰ A ta yuwusaan amali aganda. A ta yuwusan nkunu. A tsu 'yuwan ta ama. Izami ya addama i da ulinga u le. A tsu ɗana ta a tsugamu.

²¹ A ta waru tapu nu upan lon. Majiyan ma aciyele ma da goon a tsu yuwusan. She mawasan ma na ma tsu tawa na wukasu. Waru une'esun u da a ri adama a aciyele. A tsu zuwusa ta esu e le e itana ya ama o ro. Ele waru ososowi a da. A tsu 'yawa ta ubata a abukit a na ama a tsu gura golofo aciyele shi. Reve a yuwan ili yi idaba i ro koko'o. N rono ɗu ta de atsuvu, waru n to roniso ɗu

◇ 5:14 N.Gn. 19:18.

atsuvu: Aza a na a yuwusan ili i nda aa ushi aba'un o tsugono tsa Asula shi.

²² Amma na Ruhu va Asula o goloḅuso du, u ta matsan muwun n nda: I ta dana a ncigalai. I ta dana a mazanga, na asuvu nden. Ruhu ta zuwa du i yuwan ankuri. I ta dana a nkambulai. I ta yuwan ili i isa'ani. O to soḍuwo du matsan.

²³ I yuwan nden mu ulobonu na ama. Na Ruhu o ronuso du adanga i to goloḅo aci a du. Wila wu lo na waa damma ili i nda i ri ulobonu shi.

²⁴ Na ama aza e Yesu Kristi Zamawawa a da, a lyawa ta nusu le acapa ni icigi i mayan me iwuya.

²⁵ Adama a na Ruhu va Asula ca ntsu wuma u sa'avu, lyawa tsu yuwain ili i na Ruhu'u u damma ntsu tsu yuwan.

²⁶ She tsu 'yasan avangaci wan, ko tsu zuwulai addama wan, ko tsu dana a tsushu'un wan.

6

I kambulai

¹ Ama a va, na za ro atsuma a du yuwan ta unusu, to, adu a na i ri nu ucira atsuma a Ruhu i kambato vuma'a o ure u mejege. Amma i yuwan yi ben. Amma i yuwan ugbozu, adama adu fo i yuwan cu'un vi iwuya i ndolo wan.

² I kambulai nni i ri ni itana yu ume i na yaa tanu. Ni i yuwan ne, i ta dana a yuwusan ili i na Kristi Zamawawa ciga ndu i yuwan.

³ Na za ro a tarasa aciyayi ili i ro i da, agba ayi ili i ro i da shi, aciyayi a da waa lumusa.

⁴ Za suru u petelyuwe wuma wa yi. Nnu u yuwan ta mejege, u ta zangana nu ulinga wa yi.

Amma she u kurato ulinga wā yi nā linga va ama wan.

⁵ Za suru nu u 'yuwan u ciga u tanu itana ya yi.

⁶ Za na a ushishi uritosu wā Asulā, u ne'eshen ili i sa'ani i na u ri nā ayi nā manlū mā yi.

⁷ She yi lumā aciyađu wan: She i jiyan gashi i ta gura pusan Asulā ugbozu wan. Ili i na vuma cu'wain ayi da waa gasa.

⁸ Nnā a cu'wan tā adama o yo'onoto icigi yi iwuya i le, icigi yi iwuya i le i tā lungusa le. Amma nā a cu'wan adama o yo'onoto Ruhu okolo, a tā ushi wuma u babu ukotu ubatā wā Ruhu'u.

⁹ She tsu kunai nā mayan me ili i na i ri ulobonu wan, tsu tā ushi ugasa u wuma u babu ukotu u tsu a mantsa ma sa'ani nnā tsu kuḍa o ure shi.

¹⁰ Adama o ndolo tsu yuwayin ama suru isa'ani nā tsu tsura mantsa suru. U la'a tā ulobonu tsu yuwayin aza a tsu aza e Itoni i sa'ani.

Bulu koto tā ucasu wā asala

¹¹ I ta gura ene idani i gbagbain i na n yuwain ana n danai nu ukere u va.

¹² Aza a na a cigai o yo'onoto aza a Isra'ila okolo a da a yuwusan ukadu a zuwa du mapada mo uryumbu. A ta uwwusa wovon u na aza a Isra'ila a ca le atsumalima nno o toni akpata e Yesu Zamawawa goon.

¹³ Aza a na a padai de uryumbu, ele a aciyele oo tonishi Wila'a shi, amma a ciga du ta i pada uryumbu adama a 'yasan avangaci e ekere e ili i na a zuwa ndu i yuwan nu ucira.

¹⁴ Amu gba, n ciga n 'yasan avangaci a aci e ili i ro shi, she o ukwa wu Zagbain tsu Yesu Kristi Zamawawa a akpata goon. Adama a akpataf

o ndolo, maa yuwusan waru wuma cine ama o uvadi a nda a yuwusan shi. Amma a gura reve ili i na i zuwai maa yuwusan cu'un wuma'a shi.

¹⁵ Wo o'wo ili i ro shi nna a pada vuma uryumbu ko na a pada yi uryumbu shi. Amma ili i na i la'ai ulobonu ayi da vuma ushi wuma u sa'avu diga ubata wa Asula.

¹⁶ Asula a ta ca ama a na o toniyi adanshi a nda asuvu nden a yi, waru u ta zuwaa le aba'un. Ama o ndolo ele da ama a Asula a amayun.

¹⁷ Diga gogo a 'yawa, she nanza dashi damaton mu ni ili i nda waru wan. Alana a na n ri nda ne ele a lipu va o to rocosu amu za va Yesu da.

¹⁸ Ama a va, lyawa isa'ani yi Zagbain tsu Yesu Kristi Zamawawa i dana obolo na adu suru. Ami.

**Nzuwulai n Sa'avu na Tsishingini na adiva a
na a dangulai a Nzuwulai mu Ufaru
New Testament in Tsishingini (NI:tsw:Tsishingini)**

copyright © 2011 Wycliffe Bible Translators, Inc.

Language: Tsishingini

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Tsishingini

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

PDF generated using Haiola and XeLaTeX on 18 Apr 2025 from source files
dated 29 Jan 2022

bb185c63-dc44-572c-ae93-66252c4dfa1e